

L’ ôte avant-ayîr on vos avêve cauzé è “avant-prumîre” do “colloque dès langues collatérales” qui s’ va tinre do costé d’ Amiens au mwès d’ novimbe. Come on vént d’ lire, dsus l’ aragneriye, sakanthès Èlètes dsu l’ sudjèt, on s’ va fé l’ plêji d’î rivnu èto. Insi, pisk’ on a polu voye, sicrît pa on françès d’ France :” ...*que le Nord de la France, à laquelle je me sens très très fort appartenir était le sud des Pays-Bas... même si une grande partie du Nord n’ est pas de lanque néerlandaise...* », i nos faut mète li dwèt dsus one vèrité k’ èst tot d’ min.me ène miète difèrinte. Si, po Djulius Cesarius, “di tos lès peûpes dèl Gôle, lès bèljes sont lès pus brâves”, i faut ètou s’ rimimbrer ki l’ Bèljike si stindève (co © ) dèl Mènapîye djusk’ au pîds dès meûrs di... Lutècyâ. Lès Bas-Payis, èstîne dèl Djèrmanîye. On n’ va nèn rfé l’ istwère po ça, mins, quand on (r)apriend k’ lès Walons èstîne dèdjâ là avant l’ “Mêr



grande plouve” (Dèlûdje) – *do costé di Sprimont on a mètu au djoû dès pîres k’on stî tayîyes i gn’a on bia pitit miyon d’ anêyes. Èt à Engis c’ èst dès oûchas dès omes di gn’a d’ pus d’ 300.000 ans k’ on a mètu au djoû, à Sclayn c’ èstève di d’pus 125.000 èt à Spy d’ 40.000 ! - on s’ dit k’ tot conté, tot rabatu, k’ lès “colatèrâlès linwâdjès” sont tot come lès “colatèraus domâdjès” dès “tchîrurdjicâlès” tapes à gaves. On èvoye à rlaye dès fuzêyes dsus l’ gros dès tropes, tant pîre s’ i gn’a dès simpès djins po profiter dès “ptitès” spites mau tchèyeûwes. On s’ prind à tûzer à cki lès mos après tot volenut bèn dîre : “colatèral” èsse “à costé” odobén “co à costé” ? “coloke” èsseki c’ èst “co-moussî avou dès vîyès lokes” o do bèn “rèssèrâdje è moltonêye gayole pask’ one baloûche s’ pormwinrne è vosse pauv’ tièsse” ?*

Nos va-t-i bèn râde falu rcwêri (come po lès “nôbes” lès kwartîs d’ nôbèsse) nos liwinstikès kwârtis po polu nos dîre bèn

didci obén d’drola ? Kî ki wazèréve wadjî k’ totès sès tayones n’ ont mauy fricoté ène fiye o l’ ôte avou l’ bia vijin vnu do vilâdje d’ a costé obén d’ au lon o co pîre n’ a nèn stî on còp frochîye pa on invayisseû d’ passâdje. Ène miète di pus, on ène miète mwins, on a tèrtos do song vnus d’ “aliens” : ibêre, italike, britanike, djèrmanike, normandike, franke èt vos nd’ aroz min.me d’ bèn pus lon, k’ça fuche d’ Afrike o d’ Amèrike.

Esseki ça fait d’ nos dès bastauds ? K’ non.na, ça fait d’ nos dès Europèyins o tot simplumint dès umains ki rfabrikenut ène djènitike Toû d’ Babèl...

Djusse sakants ptits tûzâdjès paks’on a, bèn stichîye è l’ tièsse, l’ idêye k’ pou fé on vrê lîve di mos, on vrê dictionêre, i s’ faut r’loyî à l’ “ètimaudjîye”. Ç’ èst sûr ki ça dmande do timps mins, si on vout k’ça tègne, on n’ pout bati k’sus do deûr èt nèn dsus do sauvlon. I l’ faut sawè ètou l’ piède, si timps, dins lès vîs lîves èt sicrîjâdjès di nos ratatayons. C’èst l’ vrê, come l’a si bèn dit nosse Djulos, ki l’



*walon c’ èst l’ latèn vnu à pîds do fén fond dès âdjès. Ç’ a m’ èware co k’ lès fèls disfindeûs d’ nosse lingâdje, pu râde ki d’ voye lès rchonances dins lès ratournûres avou lès djèrminâdjès, n’ont nèn mètu totes lès lumêres dsus lès sbarantes richènces avou l’ roman k’a doné l’ françès mins k’ èst bèn co dmèré muchî dins c’k’ on dit co tos lès djoûs.*

Lès vayants ki sayenut d’ènonder ène comone manîre di scrîre totes lès cougnes di walon (i lomenut ça li “rfondu”) volenut k’ on î rtrove li “prononçadje” di Lîdje èt d’ avaurla dins c’k’il a d’pus caractèristike : li “H”. Insi, vèla « âhe » c’èst “auje” ôte pau. Pokwè ? paski dins l’ vî-vî timps on dijève èt sicrijève tot simplumint “aise” ! On “s’aaciève” lès dints avou ène bèn seurète pome; on s’ “aagéve” tot purdant d’ l’ âdje; on “aamève” è cominçant à vîre voltîye s’ vijène; on s’ “aatève” pou l’ vîre passer; on arivève min.me à “aaner” è donant d’ francs còp d’ rin; èt “aran.ner” èvoye è ètindant s’ pa mète à “a-uchî”...

(à chûre, ptète©)

On saye di continuer à tot comachî...